



FYLKESMANNEN I SOGN OG FJORDANE

Sakshandsamar: Tore Larsen
Telefon: 57643126
E-post: fmsftla@fylkesmannen.no

Vår dato
16.09.2015
Dykkar dato
06.07.2015

Vår referanse
2015/1127 - 433.2
Dykkar referanse

Vidar Årdalsbakke Djupvik
Årdal Ytre
6843 SKEI I JØLSTER

Løyve til utsetjing av utanlandske treslag (fjelledelgran)

Vi viser til søknad frå deg datert 6.7.2015, om utplanting av utanlandske treslag for produksjon av juletre.

Bakgrunn

Forskrift om utsetjing av utanlandske treslag trådde i kraft 1. juli 2012, og skal hindre at utplanting av utanlandske treslag får uheldige følgjer for naturmangfaldet. Forskrifta har heimel i naturmangfaldlova, og det går fram av §30 i lova at utsetjing av utanlandske treslag krev løyve, og at slikt løyve ikkje kan bli gitt dersom det er grunn til å tru at utsetjinga kan føre til vesentlege uheldige verknader på det biologiske mangfaldet.

Søknaden gjeld utplanting av fjelledelgran (*Abies lasiocarpa*) på dyrka mark på gnr/bnr 3/9, Årdal Ytre, i Jølster kommune. Det omsøkte området er oppgitt til 2,6 dekar, og det er planlagt å plante ut 1500 tre.

Vurdering

Artsdatabanken har i *Fremmede arter i Norge, med norsk svarteliste 2012* klassifisert økologisk risiko for ei rekkje innførte artar. Fjelledelgran er vurdert til å vere av låg risiko, særleg fordi arten har lita arealmessig utbreiing og fordi forynging truleg er avgrensa på grunn av hjortebeiting. Fjelledelgran er oppgitt å normalt setje frø frå 30-40 års alder under våre tilhøve, men i andre kjelder er dette oppgitt til 20 år (DN-utredning 8-2012 *Kunnskapsstatus for spredning og effekter av fremmede bartrær på biologisk mangfold*).

Fylkesmannen har forutan Artsdatabanken sine sider om framande artar vurdert eventuelle konflikhtar med prioriterte og utvalde naturtypar (Naturbasen), raudlista artar (Artskart), og våre egne data om sensitive førekomstar (rovfugl o.a.) som er skjerma for offentleg innsyn. Jølster må reknast som ein mindre godt kartlagt kommune med tanke på naturtypar og artar, særleg fordi det berre er gjennomført éin runde med naturtypekartlegging, som skriv seg frå 2003. At den omsøkte teigen er del av eit større felt med fulldyrka jord betyr uansett at ein ikkje kan forvente førekomstar av spesiell interesse (kart og flyfoto tyder ikkje på at her kan vere verdifull slåttmark eller naturbeitemark). Ettersom søknaden gjeld produksjon av tre som blir hausta lenge før reproduktiv alder, er frøspreiing frå lokaliteten heller ikkje noko trugsmål mot eventuelle naturverdiar i omgjevnadane så lenge utplantinga blir følgt opp etter føresetnadene. Eit ekstra moment er at skogen i området rundt det omsøkte arealet (i underkant av 200 m unna) er sterkt prega av granplanting. Vi meiner derfor at kunnskapskravet i naturmangfaldlova § 8 er godt nok oppfylt til å konkludere med at utplanting som skissert i søknaden ikkje vil føre til vesentlege uheldige verknader på det biologiske mangfaldet.

Rettleiinga til forskrift om utsetjing av utanlandske treslag seier at ei vurdering av samla belastning på naturmangfaldet (naturmangfaldlova § 10) i tiltaksområdet skal inngå i behandlinga av søknaden. Ut frå det som står i søknaden om at alle dei utplanta trea blir hausta og ingen blir

stående igjen, meiner vi at tiltaket ikkje vil føre til auka samla belastning på økosystemet i området. Til grunn for dette ligg at alle tre blir hausta før dei når reproduktiv alder.

Vi minner likevel om naturmangfaldlova § 11 (kostnadar ved miljøforringing skal berast av tiltakshavar) og § 12 (miljøforsvarlege teknikkar og driftsmetodar), som tyder at tiltakshavar må ta kostnadene med å sikre at det ikkje blir spreidd frø frå feltet fordi det blir ståande igjen tre dersom drifta av ulike grunnar skulle bli lagd ned, og at driftsmetodar o.a. skal tilpassast slik at ein unngår eller avgrensar skade på naturmiljøet. Tilplanting på kulturmark er eit reversibelt tiltak, og når området ikkje har spesielle verdiar knytte til kulturlandskap og ein sikrar seg mot frøspreiing, vil det neppe få vesentlege uheldige følgjer for naturmiljøet.

Vedtak

Med heimel i forskrift om utsetjing av utanlandske treslag til skogbruksføremål, jfr. naturmangfaldlova § 30, blir det med dette gitt løyve til å plante ut fjelledelgran på gnr. 3, bnr. 9 i Jølster kommune, i eit område på 2,6 dekar merkt med skravur på kart som var vedlagt søknaden. Løyvet er gitt på desse vilkåra:

1. Løyvet gjeld for ei utsetjing. Utplantinga må vere fullført innan 31.12.2017.
2. Alle trea skal fellast før dei blir frøproduserande. For å hindre spreiring, er det ikkje tillate å fjerne tre med rot frå feltet.
3. Etter at feltet er hausta, skal alle ikkje-omsettbare tre fjernast og feltet ryddast slik at det ikkje kan kome nye skot.
4. Den som har fått løyve, må etablere og dokumentere internkontroll etter § 10 i forskrift om utsetjing av utanlandske treslag til skogbruksføremål.
5. Dersom eigedomen blir overdregen til andre, må ny eigar informerast om løyvet og dei vilkåra som er sette for løyvet.
6. Dersom det blir oppdaga spreiring av tre utanfor plantefeltet, skal desse fjernast, og Fylkesmannen i Sogn og Fjordane må varslast.
7. Dersom drifta av ulike grunnar skulle ta slutt utan ordinær innhausting, skal grunneigar varsle Fylkesmannen. Dersom ikkje grunneigar ønskjer å rydde feltet sjølv, kan feltet ryddast for grunneigar si rekning.
8. Dette løyvet skal oppbevarast hos tiltakshavar og grunneigar inntil feltet er rydda.
9. Dette løyvet kan opphevast eller endrast i samsvar med § 67 i naturmangfaldlova, dersom det t.d. kjem fram nye opplysningar om dei omsøkte artane.

Klage

Dette vedtaket kan påklagast innan 3 veker etter at brevet er motteke, jf. reglane i forvaltingslova. Klagen sendast til Fylkesmannen i Sogn og Fjordane, og blir avgjort av Miljødirektoratet dersom Fylkesmannen ikkje gjer om vedtaket.

Med helsing

Johannes Anonby
seniorrådgjevar

Tore Larsen
seniorrådgjevar

Brevet er godkjent elektronisk og har derfor ikkje underskrift.

Kopi til Jølster kommune